

CIMITERO MEDITERRANEO

(*preghiera della sera*)

Mi, la sera quand che vo in let,
Me vegn 'n la ment quei barconi, quei caret
Con qui poerin schiscià denter com'i sardin
Per poeu vess 'bandonà al so destin.

In scapàa de la miseria in cerca de fortuna
E l'è no che pretenden de vorè la Luna
Ghe n'avrissen assé d'on tochelin de tera
De podé viv in pas senza fam né guera
Tanti, invece, finisen per 'negà
In mez al mar senza riusì a rivà.

Oh! L'è no che num fassom propi nient
Ne discoren persin 'n del Parlament
E, dopo tanto ciciarà, 'sicuren che ghe pensaran a sora
Ma intant che la pora gent la va in malora!
S'in trovà persin tuti i capi de governo
Per vedé de tirai foeura de quel'inferno
Ma dopo c'han fa 'na bela ciciarada
Ognun l'è tornà a cà per la sua strada!

O Signor: domà Ti te podet a quei malament
Tocag el coeur che smeten de sfrutà la gent
E a quei che patisen per la guera e la fam
Trovà la manera de tirai foeura di so malan
Che poden sistemas in d'on quai sit
De riusì a tirà grand in pas i so fiolit.

Me giri in let con 'sto penser ogni sera
E riessi a ciapà sogn domà cont'ona preghiera:
'Scoltom, Signor, guarda 'sta pora gent
Fa che troeuven pas e sien content..

Amen.

Don Arnaldo